
Protocol

dalla radunonza communal

Gi e temps	vendergis, ils 12 da zercladur 2020 allas 20.00
Liug	Aula Grava
Presidi	President communal Franz Gschwend
Protocol	Substitut menader administraziun communal Rest Giacun Coray
Presenza	115 votantas e votants, 6 hosps e 2 representants dallas medias
Dumbravuschs	Cedric Brunold e Markus Stoffel
Biro electoral	Substitut menader administraziun communal plus dumbravuschs
Tractandas	<ol style="list-style-type: none">1. Approbaziun dil protocol dalla radunonza communal dils 04-12-20192. Rendiment da quen<ol style="list-style-type: none">a) Rapport annual 2019 dil president communalb) Quen annual 2019c) Quen onn da scola 2018/19 dil consorzi da scoletta e scola primara scolaviva dallas vischnauncas Laax e Falerad) Quen onn da scola 2018/19 dil consorzi da scola superiura scolaviva dallas vischnauncas Laax, Falera, Sagogn e Schlueine) Rapport annual e quen annual 2019 dalla fundaziun Pro Laaxf) Rapports dalla cumissiun da gestiun e dil post da revisiun3. Approbaziun<ul style="list-style-type: none">- dil rapport annual dil president communal- dil quen annual- dil quen digl onn da scola dil consorzi da scoletta e scola primara scolaviva- dil quen digl onn da scola dil consorzi da scola superiura scolaviva- dil rapport e quen annual dalla fundaziun Pro Laax- descharscha alla suprastonza, all'administraziun e funcziunaris sco era als organs dil consorzi da scoletta e scola primara scolaviva, dil consorzi da scola superiura scolaviva e dalla Pro Laax4. Elecziuns cumpressivas 2020 - 2021<ul style="list-style-type: none">- 1 commember dalla supastonza communal (1 demissiun)5. Elecziuns parzialas 2020 - 2023<ul style="list-style-type: none">- 2 commembers dalla supastonza communal6. Damonda da credit da frs. 700'000 per metter sut tiara las lingias d'aulta tensiun

7. Cunvegna pertuccont dretgs d'utilisaziun d'aua

8. Communicaziuns e varia

1. Approbaziun dil protocol dalla radunonza communal dils 04-12-2019

Il protocol vegn approbaus unanimamein.

2. Rendiment da quen

a) Rapport annual 2019 dil president communal

Franz Gschwend renviescha al rapport annual e prelegia entginas passaschas sin las paginas 2 tochen 7 dil quen annual.

b) Quen annual 2019

Tier il repassament dil quen annual 2019 dalla vischnaunca dat il menader dallas finanzas ina survesta generala e declara las pli grondas differenzas visavi il preventiv ni igl onn precedent. El secund onn che la vischnaunca da Laax fa il quen tenor il model harmonisau da contabilitad 2 (MAC2) ei la cumparegliaziun semigliurada considerablamein.

Suenter ils onns da record 2016 e 2017 sco era il resultat positiv dil quen 2018 ei la vischnaunca da Laax restada era il 2019 finanziamein silla ruta da success. Il quen 2019 siara cun in cash flow da frs. 5'587'154.70, quei tier entradas da frs. 19'387'116.21 ed expensas da frs. 13'799'961.50. Ina summa da 583'600 francs dil gudogn brut vegn duvrada per amortisaziuns. Il quen 2019 siara cun quei cun in gudogn schuber da frs. 5'003'554.70; e cun quei in bionton meglier che 2018 (frs. 3'871'925.82).

Il quen d'investiziun siara tier investiziuns bruttas da frs. 10'957'542.02 e contribuziuns d'investiziun da frs. 6'153'877.20 cun investiziuns nettas da frs. 4'803'664.82. Tenor il mussament dil gudogn e dalla finanziaziun sin las paginas 12 e 13 eis ei stau pusseivel da far quellas investiziuns ord atgna finanziaziun cun in resultat da finanziaziun positiv.

Per la fin digl onn 2019 munta la summa dalla bilanza a frs. 65'735'808.42. La gronda part dallas activas (66%) secumpona dalla facultad finanziaria che munta a bien 43 miu. francs. Ils ulteriurs 34% crodan sin la facultad administrativa cun ina summa da ferm 22 miu. francs. Las passivas secumponan dil capital jester (5% resp. frs. 3'498'413.81) e per la gronda part dil capital agen che munta a frs. 62'237'394.61 (95%).

c) Quen onn da scola 2018/19 dil consorzi da scoletta e scola primara scolaviva dallas vischnauncas Laax e Falera

Christian Capaul presenta ton il quen administrativ cun expensas ed entradas totalas da frs. 2'086'983.77 sco era la bilanza cun ina summa da frs. 615'724.88. Ils cuosts netto per scolar muntan a frs. 9'262 tier la scoletta ed a frs. 12'909 tier la scola primara.

d) Quen onn da scola 2018/19 dil consorzi da scola superiura scolaviva dallas vischnauncas Laax, Falera, Sagogn e Schluein

Il quen administrativ siara cun expensas ed entradas dad frs. 1'748'458.24 e la bilanza cun ina summa da frs. 508'057.05. Ils cuosts netto per in scolar da Laax muntan a frs. 21'822 tier la scola superiura.

e) Rapport annual e quen annual 2019 dalla fundaziun Pro Laax

Erwin Ardüser renviescha al rapport annual ch'ei publicaus sin las paginas 55 tochen 56 e presenta cuort il quen administrativ e la bilanza. Dallas entradas totalas da frs. 715'025.04 derivan frs. 647'414.00 ord las taglias da midada da maun. Risguardond las expensas da frs. 643'621.44 munta il surpli d'entradas a frs. 71'403.60.

f) Rapports dalla cumissiun da gestiun e dil post da revisiun

Ton il president dalla cumissiun da gestiun, Max Welter, sco era Norbert Cavegn dalla canzlia-fiduziara SA, Glion renvieschan als rapports en scret ch'ei nudai el quen annual 2019 sin las paginas 60 tochen 63 e proponan l'approbaziun dils quens e la scarica da tut ils responsabels cun admetter ad els in bien engraziament per la lavur prestada.

3. Approbaziun

La raspada suonda quella proposta ed approbescha unanimamein il rapport annual dil president communal, il quen annual, il quen digl onn da scola dil consorzi da scoletta e scola primara scolaviva, il quen digl onn da scola dil consorzi da scola superiura scolaviva sco era il rapport e quen annual dalla fundaziun Pro Laax e dat aschia descharscha alla suprastonza, all'administraziun e funcziunaris sco era als organs dil consorzi da scoletta e scola primara scolaviva, dil consorzi da scola superiura scolaviva e dalla Pro Laax.

4. Elecziuns cumplexivas 2020 - 2021

Il parsura passa tier quella tractanda entras orientar davart la demissiun extraordinaria inoltrada da Christian Capaul sco commember dalla suprastonza communal per ils 30 da zercladur 2020. Franz

Gschwend engrazia en fuorma resentida per siu engaschi nunstunclenteivel en favur dalla scola e dalla vischnaunca. Suenter quell'undrientscha vegn passau tier las elecziuns cun preleger las duas candidaturas en scret dad Othmar Schärer e Vendelin Deflorin. En num dall'uniun da commerci e mistregn presentan e proponan Urs Hasler e Silvia Thoma il candidat Vendelin Deflorin. Ulteriuras nominaziuns vegnan buca fatgas, aschia ch'ei vegn passau tier l'elecziun.

Resultat digl empren scrutini:

Cedels repartgi	115
Cedels entrai	114
Cedels vits	14
Cedels nunvaleivels	0
Cedels valeivels	100

Vuschs da candidats	100
Pli absolut	51

Elegius ei:
Othmar Schärer cun 58 vuschs

Plinavon han obteniu vuschs:
Vendelin Deflorin cun 36 vuschs
Singuls 6 vuschs

Sco plaid final dallas elecziuns cumplexivas gratulescha ed engrazia il president communal per la promptadad da surprender in uffeci public. La perioda d'uffeci ordinaria cuoza aunc entochen ils 30 da zercladur 2021.

5. Elecziuns parzias 2020 - 2023

Il parsura passa tier quella tractanda entras orientar che Marita Buchli sco cau dil departament agricultura, alps, protecziun dalla natira e digl ambient, turissem e cultura sco era Beat Camathias sco cau dil departament lubientschas da baghegiar, stradalessen, provediment d'aua, canalisaziun, dismessa da rumians (gruppa stradala) e polizia da baghegiar stattan a disposiziun per in'ulteriura perioda e valan sco proponi. Ulteriuras nominaziuns vegnan buca fatgas, aschia ch'ei vegn passau tier l'elecziun.

Resultat digl empren scrutini:

Cedels repartgi	115
Cedels entrai	115
Cedels vits	6
Cedels nunvaleivels	0
Cedels valeivels	109

Vuschs da candidats	178
Pli absolut	60

Elegi ein:

Beat Camathias cun 93 vuschs

Marita Buchli cun 77 vuschs

Plinavon han obteniu vuschs:

Singuls 8 vuschs

Il parsura gratulescha per la reelecziun e fa attents che la nova perioda d'uffeci entscheiva igl 1. da fenadur 2020 e cuoza treis onns.

6. Damonda da credit da frs. 700'000 per metter sut tiara las lingias d'aula tensiun

Franz Gschwend ed ils representants dalla Repower Roland Leuenberger e Gerhard Bräuer presentan il project da metter sut tiara la lingia d'aula tensiun. Ei setracta dad ina lingia da 60 kV che traversa sin ina distanza da 3,5 kilometers il vitg da Laax sin 20 petgas. Il contract dil december 2019 denter la Repower e l'Axpo Hydro Surselva, in'otra producenta d'electricitad, ha aviert la via per far uorden culla reit da cables. Repower ha surpriu dall'Axpo la lingia libra tras Laax cun la finamira d'integrar quella en sia infrastruttura e da metter sut tiara la lingia libra tochen igl onn 2035. Egl interess dalla vischnaunca e dall'interpresa duei quei succeder ton pli spert. Damai ch'ils implonts han aunc buc contonschiu la vegliadetgna da remplazzar e l'infrastructura ha aunc ina certa valeta, san ils cuosts buc vegnir adossai als consuments, aschia che la vischnaunca ha da pagar senza ina cumpart da frs. 700'000. Tenor il plan da termins ei previu d'entscheiver igl avrel 2021 cun las lavurs da construcziun bassa vid il conduct niev denter Fletg e Staderas. Quel meina sut tiara en in liung artg atras territori nunhabitau. Sco che la lingia nova vegn prida en funcziun sa la proveditura demontar la lingia libra. Il maletg dil vitg vegn a semidar essenzialmein naven dalla primavera 2023 cura che la Repower allontanescha las 20 petgas d'aula tensiun.

Discussiun:

Il motiv per las interrupziuns repetidas dil current a Cons tenor la remarca da Silvia Thoma ei buc enconuschents als referents.

Tscharna:

La radunonza conceda il credit cun vusch unanima tier ina 1 abstenziun.

7. Cunvegna pertuccont dretgs d'utilisaziun d'aua

Suenter ina cuorta introducziun surdat il parsura il plaid al giurist communal Gieri Caviezel, il qual explica la cunvegna denter las vischnauncas da Laax e Sagogn che conceda dretgs d'utilisaziun d'aua vicendeivels per il provediment d'aua da beiber els territoris Val Runs e Fuorcla. Quei dretg duei vegnir concedius per 80 onns, quei vul dir entochen ils 31 da december 2099. La radunonza communal da Sagogn decida ils 15 da zercladur 2020 en caussa.

Discussiun:

Las damondas da capientscha vegnan rispundidas per cuntentientscha dils treis questunaders.

Tscharna:

Cun in resultat da 113:1 ed ina abstenziun dat la raspada il consentiment tier quella convegna.

8. Communicaziuns e varia

8.1 Via da velos Staderas - Flem

Il parsura informescha che quei project sa vegnir realisaus aschi prest ch'il cantun Grischun dat il consentiment per in susteniment finanziel.

8.2 Rundella Marcau

Suenter la decisiun negativa dalla dertgira federala en causa embelliment dalla rundella Marcau vegn inziau ina nova concorrenza publica per ina creaziun artistica.

8.3 Program da rama

Pervia dalla situaziun actuala cun il coronavirus vegn la vischnaunca ad organisar igl aperitiv previu e la tscheina ensemen cun la finiziun dalla meglieraziun generala igl atun 2020. Il cantun Glaruna vegn lu presentaus dad ina gruppa folcloristica ed era las spigias ein inspiradas da quei cantun.

8.4 Inauguraziun Aua Grava / wellnessHostel³⁰⁰⁰

L'avertura dad Aua Grava / wellnessHostel³⁰⁰⁰ ei terminada ils 18 da december 2020, aschia che la fiasta d'inauguraziun ha liug il schaner 2021.

Finiziun dalla radunonza allas 22.15

Laax, ils 12 da zercladur 2020

Il president communal:



Franz Gschwend



Il substitut menader administraziun communal:



Rest Giacun Coray